

bleiben/damit sie nicht etwa von dergleichen grimmingen hauwenden Thieren beschädigt / oder aber gar vmbgebracht werden. Belangend die Hirsch vnd andere leichte Thier/sollen die Jäger auch allezeit allenthalben wohin die Hund lauffen/neben mit vnd darbey seyn/ ihnen stracks vnd nicht vberzwerch nachfolgen/damit im jagen die Fahrt nicht zertreten werden/vñ sol derhalb seinen Jaghunden nicht näher denn auff fünffzig Schritt nähern/sonderlich wenn sie von der Kuppel auff die Post allererst frisch abgelassen/Denn wo der Hirsch seine tück vnd arglistigkeit brauchen/vnnd die Jäger darzu erst den Hunden zu nach folgen wolten / würden sie dem Hirsch die Fahrt verbrechen vnd zertreten/vnd die Hund vergeblich fürüber lauffen/welches sehr gröblich vbersehen were/So aber die Jäger sehen würden/das der Hirsch ein Stund oder mehr gelauffen / vnnd seine außflucht suchet/sich von den Jaghunden weit beseits machet vnd verschleicht/ Item so die Hund auch auff den Wegen vnd der Fahrt wol anbracht vnd beyssammen halten/ mögen sie alsdenn näher denn zuvor sich zu jnen thun/vnd vberlaut etlich mal freudig im Horn jagen. Darzu ist auch zu wissen/das ein Hirsch wenn die Hund auff im seyn/so bald er kan vnd mag / von ihnen sich abwende/ aufreisse vnd auff mancherley weiß sich abwende / denn er suchet die andere Thier in ihren Ständen/ treibet sie auff/vnd thut sich daselbsten nider/bleibt allda ein zeitlang bis das die Jaghund alle mit einander fürüber lauffen/vnnd ihn also nicht weiters durch die Fahrt vernemmen mögen/ Sintemal er sich auff den Bauch nider thut / vnd alle vier zu sich nimpt/ denn er ist der tückischen Natur / das er gar weiß/das ihn die Jaghund mehr an seinem Athem vnd Fahrten / denn sonst andern Merckzeichen vernemmen können/vnter des aber wartet er/vnnd gehet nicht ehe herfür / Es seyen denn die Jäger Hund vnd Kopf fürüber/darumb sol man allwegen Bruch auff die weg / welche der Hirsch laufft/werffen/damit man so manchen Widergang er thut/so bald auch auff die letzte Fahrt ihm nachfolgen möge/dardurch man ihn widerumb in das Jagen zu bringen nicht wol fehlen kan / Wenn nur der Jäger mit seinem Leithund vnd andern den besten außerlesensten Jaghunden auff welche er sich zu verlassen immer strack vnd fleissig nachfolgt / So denn ein alter guter Hund außgeben vnd laut würde/sol der Jäger sich zu ihm nahen / auff die Erden sehen / ob es ein Hirsch sey / Ist es denn ein Hirsch/sol er im Horn jagen/seinem Hund zuschreyen/vnd im mit Namen ruffen also/ Da kompt er her/schauw da kompt er her/der Edel Hirsch kompt daher/schauw daher / da kompt er her/ N. du hast recht/trauwter Hund du hast recht/ da kompt der Edel Hirsch eynher.

Die andern Jäger sollen die Jaghund annemmen/im Horn jagen / vnd sie den Hirsch kecklich anzufallen mit vollem lautendem jag vnd Wendgeschrey anreizen vnd ganz freudig machen/dieser gestalt sie jre Fahrt wider finden / auch den Hirsch widerumb in die fluch bringen vnnd jagen werden. Es suchet auch ein Hirsch seine außflucht auff diese manier / Vnnd wenn er nemlich sihet das er von Hunden hefftig gejagt wirt/ vnnd jnen nicht leichtlich entgehen oder aufreissen mag/so laufft er von Holz zu Holz/von einem Ort zum andern/ treibet die andern wilden Thier auff/gesellet sich zu jnen/führet sie mit sich/verlasset sie mit gern / vñ laufft also zu weilen ein ganze Stund mit jnen herumb/vnnd so er darnach sihet/ das er fast müd vnd abgemattet / verlast er dieselbigen/vnd versüchet seine tück vnd arglistigkeit/entweder in grossen Wegen/ oder aber stillstehenden vnnd fließenden Wassern / welchen er stracks zu vnnd so lang nachzeucht / so lang in immer seine Fuß er tragen mögen/ So er sich den weit gnugsam von Hunden empfindet/erdencet er allerley grosse list/thut sich zur Erden oder ins Wassers nider/zeucht die vier Leuff an sich/oder in Wassern versteckt er sich tieff/das im alleine der Kopff heraußer scheinet/ also/das die Hund fürüber schwimmen/vnnd sein nit bald achten. So den die Jäger solches sehen/sollen sie wenn der Hirsch sich zu andern Thieren gesellet/sich mit den besten Jaghunden gefast machen/vnd fleissig nachfolgen/ welches die junge Jaghund nicht thun/vnd derhalb jnen auch wenig zu trawen/Auff die alten Jaghund aber mag man sich wol vnd sicherlich verlassen. Vnd ob sichs villeicht zutrüge/das die Hund irren vnd verfehlen/vnd sich auff zween oder drey Hauffen vertheilen vnd verlieren würden/mag man daher bey sich selbs diese vermutung haben/das sie die Fahrt verloren/vnd der Hirsch Widergang gebraucht hab/vnd wenn denn etliche von den jungen noch vnabgerichten vnd läppischen Hunden allein/one die alten Jaghund/erzeigen solten/als wenn sie die recht Fahrt ergreifen / sollen die Jäger jnen nit so leichtlich trawen/sonder viel mehr auff die alte/vnd an welchen orten sie die rechte Fahrt gefunden vnd antrouffen/achtung geben/zu jnen nahen/ vnnd die Fahrt auff der Erden selbs augenscheinlich vnd wol abschen/Wenn sie hierauff befinden/das sie eben an demselbigen ort der Fahrt verfehlet/sollen sie auff ein neues verbrechen/im Horn jagen vnd darnach also schreyen / da laufft der Edel Hirsch eynher Gesell/da laufft der Edel/ du hast recht trauwter Hund / du hast recht/ da kompt der Edel Hirsch eynher.

Es ist auch allhie zu mercken/das die Hund auff den grossen Wegen sehr bald verfehlen/darzu sehr falsch vnd betrüglich suchen/darumb das gemeinlich auff grossen Wegen alle andere Thier gehen vnd lauffen/welche solchen Staub erregen vnd machen/ das davon die Fahrt zugedeckt/vnd